

Vijećnička pitanja:

Behija Kulović: je postavila dva vijećnička pitanja. Prvo je da li je u prioritetima zamjena rasvjetnih tijela i sijalica kod spomenika i osvjetljavanje mosta na raskrsnici kod Hife i spomenika koji je već neko vrijeme u mraku? Drugo pitanje je kad će se pristupiti izradi Gender akcionog plana 2022-2024. godina?

Safet Šahman: je postavio dva vijećnička pitanja i to u kojoj su fazi razgovori vezani za prekid autobusnih linija iz udaljenih mjesta sa područja naše općine i drugo kada će doći do realizacije planiranih projekata prema Brnjicu, obzirom da je primjetno da u posljednje dvije godine nije niti jedan projekat realizovan, osim probijanja puta koji nije pušten u funkciju?

Dževdet Huskić: je postavio dva vijećnička pitanja. Prvo je koliko vlasnika ili zakupaca poslovnih prostora u Kaknju plaća komunalnu naknadu Zavodu za planiranje i izgradnju općine Kakanj, te je tražio da mu se dostave kopije svih izdatih rješenja na osnovu kojih se uplaćuje komunalna naknada, a drugo pitanje je koja je namjena „tajanstvenog“ 4. sprata u zgradi Općine Kakanj?

Branko Češljic: je postavio dva vijećnička pitanja. Prvo pitanje je hoće li se zbog uranjene suše, propisno koristiti vodeni topovi kako bi se spriječilo širenje prašine s deponije uglja iznad naselja Čatići? Drugo pitanje je šta Općina Kakanj konkretno može poduzeti da do sad uništeno područje i prirodne resurse gornjeg toka rijeke Trstionice zaštiti od daljnjeg uništenja?

Predsjedavajući je konstatovao da je vijećnik Aldin Šljivo postavio vijećničko pitanje bez korištenja govornice.

Aldin Šljivo: je postavio vijećničko pitanje koliko puta i kada je posljednji put izvršeno sapiranje Ulice 311 lahke brigade u Kaknju na dionici od naplatnih kućica do kružnog toka u Kaknju, jer je predmetna dionica puta najpriljaviji dio grada od raznih nečistoća koje se nalaze na kolovozu.

Vijećničke inicijative:

Safet Šahman: je pokrenuo dvije vijećničke inicijative. Prva je za suzbijanje štete na privatnim poljoprivrednim imanjima koju nanose divlje svinje, pa je u tom smislu predložio da se pokuša u saradnji sa LD „Srndač“ Kakanj pronaći rješenje. Druga inicijativa je da se izvrši primopredaja prostorija ambulante Krševac ili da se oslobodi prostor ili da izvrši primopredaja Općini Kakanj, kako bi se MZ Krševac dobrovoljno odrekla ovog objekta i odustala od vlasništva.

Behija Kulović: je pokrenula dvije vijećničke inicijative. Prva je za uređenje parkinga i zelene površine kod zgrada u Ulici Šehida, jer se radi o frekventnoj ulici sa velikim brojem pješaka zbog blizine tri srednje škole. Veći dio ulice nema trotoar, a za stanare okolnih zgrada problem predstavlja neuređen parking prostor kod zgrade preko puta Gimnazije i neuređena i zapuštena zelena površina iza zgrade. Druga inicijativa je se odnosi na poboljšanje finansijskog statusa poslenika u JU „Gradska biblioteka“ Kakanj, te je s tim u vezi predložila da se u rebalansu Budžeta planiraju sredstva za tu namjenu i to iznos od 11.651,40 KM za deset mjeseci (na mjesečnom nivou 1.165,14 KM), kao i da se aneksom na postojeći ugovoru između Općine i Biblioteke, koji reguliše međusobna prava i obaveze, reguliše i način korištenja ovih sredstava.

Vinka Aletović: je pokrenula dvije vijećničke inicijative. Prva je za postavljanje zaštitne mreže na poligonu Grbavica u MZ Varda, jer je taj poligon svega nekoliko metara udaljen od stambenih objekata, pa zbog nedostatka zaštitne mreže često dolazi do razbijanja prozora na kućama, prljanja fasade, uništavanja ograde, ali i do povreda starijih osoba koje žive u neposrednoj blizini, a sve zbog sportskih aktivnosti koje se odvijaju na poligonu. Druga inicijativa se odnosi na ponovno aktueliziranje teme korištenja prirodnog resursa – termalni izvor Tičići. Napomenula je da je Stručna komisija još 2012. godine odredila potencijalni lokalitet u Bilješevu za izgradnju banjsko-lječilišnog i rekreativnog centra, te da su mnoge pripreme radnje već učinjene. Smatram da se svi relevantni faktori trebaju uključiti i učiniti maksimalne napore za pronalazak investitora kako bi ova blagodat bila iskorištena.

Nerma Aliefendić: je pokrenula vijećničku inicijativu da se izvrši uređenje i ograđivanje dječijeg igrališta pored rijeke u Tršču koje je od izgradnje postalo mjesto okupljanja djece, a kako bi se trend korištenja istog nastavio potrebno je izvršiti uklanjanje korova, čišćenje kanala pored igrališta i drugo. Osim pomenutog izražen je problem uništenja igrališta zbog ulaska životinja, pa bi radi zaštite igrališta i zasada oko igrališta

poželjno bilo isto ograditi niskom ogradom, što bi ujedno povećalo i sigurnost djece obzirom da se s jedne strane nalazi cesta, a sa druge rijeka.

Dževdet Huskić: je pokrenuo dvije vijećničke inicijative. Prva je za sprovođenje čišćenja i uređenja ulica, kao i održavanje zelenih površina, korita rijeke Zgošće i igrališta, te obezbjeđenje njihovog redovnog održavanje na čitavom prostoru općine Kakanj. Kao razloge je naveo zapuštenost i nečistoća sporednih ulica, nekošenje zelenih površina i neodržavanje igrališta, u centru i na periferiji grada, a posebno je istakao problem nečistoće i održavanja saobraćajnica u prigradskim naseljima i selima. S tim u vezi je tražio da JP „Vodokom“ u saradnji sa nadležnim općinskim službama, poduzme sve neophodne aktivnosti kako bi se riješio navedeni problem. Druga inicijativa je da javna preduzeća usklade cijene usluga sa mogućnostima svojih korisnika, uvažavajući trenutnu ekonomsku situaciju u zemlji i svijetu, napominjući da su većina penzionera i nezaposlenih ekonomski ugroženi i svakodnevno se bore za opstanak i preživljavanje. U skladu s tim traži da Općina, nadležne službe i javna preduzeća osmisle model i način kako da pomognu najugroženijim kategorijama stanovništva.

Izudin Puščul: je pokrenuo dvije vijećničke inicijative. Prva je za postavljanje zvučne izolacije od naplatnih kućica pored autoceste na onim dijelovima gdje autocesta prolazi pored naselja i to na cijelom području općine Kakanj gdje autoput prolazi kroz/pored naseljenog mjesta. Druga inicijativa je za čišćenje i okresavanje grmlja i drveća od naplatnih kućica u Kaknju do benzinske pumpe „Trgošped“, u cestovnom pojasu regionalne ceste. Podsjetio je da se radi o glavnom ulazu u Kakanj iz pravca autoceste, gdje se na obje strane puta nalazi grmlje i drveće koje smanjuje i ometa vidljivost učesnicima u saobraćaju. Također, neki od stubova ulične rasvjete su počeli zarastati u grmlje i drveće.

Armin Bašić: je pokrenuo vijećničku inicijativu za saniranje udarnih rupa i ulegnuća na putu od OŠ „15. april“ prema naselju Koprivnica, obzirom da predmetni put pripada MZ Doboj, a isti predstavlja glavnu komunikaciju za MZ Koprivnica, predstavnici MZ Doboj nemaju interes za delegiranje odgovarajućeg projekta za sanaciju spornog puta.

Predsjedavajući je konstatovao da su vijećnici Sabit Čehajić i Adnan Čobo podnijeli vijećničke inicijative bez korištenja govornice.

Sabit Čehajić: je pokrenuo vijećničku inicijativu da se u dijelu pored Veterinarske stanice postave usporivači brzine radi bezbjednosti djece kao i rješavanje proširenja raskrsnice za naselje Plandište na novoj saobraćajnici. Na pomenutoj raskrsnici smanjena je preglednost, a i širina puta prema Plandištu je neodgovarajuća za dvosmjerni saobraćaj.

Adnan Čobo: je pokrenuo dvije vijećničke inicijative. Prva je za osnivanje Javnog preduzeća „Gradski prijevoz“ Kakanj, s tim da se inicijativa razmotri od strane općinskog načelnika, nadležnih službi, građana i Općinskog vijeća. Druga inicijativa je da se konstatuje trenutno stanje planskih aktivnosti Općine Kakanj po pitanju uređenja korita rijeke Zgošće na dionici od mosta na „Crnoj rijeci“ do mosta na kraju naselja Zgošća, te da se u svakom slučaju iste nastave ili pokreću. U sklopu inicijative je predložio da nadležna služba da određene informacije ili podnese izvještaj o trenutnoj situaciji po ovom pitanju.